


# **Vischnaunca da Medel/Lucmagn**



**Uorden disciplinar per las scolas  
dalla  
vischnaunca da Medel/Lucmagn**

## **I. En general**

---

### **Art. 1 Intent**

<sup>1</sup> Igl uorden disciplinar vala per tut ils scolars che frequentan las scolas dalla vischnaunca da Medel.

<sup>2</sup> Ensemen cun la lescha da scola duei el gidar a contonscher in menaschi che lubescha da luvrar, d'instruir e sescolar a moda efficienta ed emperneivla. Igl uorden disciplinar regla las cumpetenzas dallas autoritads da scola e dils scolars sco era la procedura en cass da surpassaments dils scolars viers la disciplina da scola.

### **Art. 2 Instrucziun, absenzas, congedis**

<sup>1</sup> Ils temps da scola ein d'observar.

<sup>2</sup> Per absenzas, congedis ed extradadas dalla scola avon temps valan las prescripziuns dalla lescha da scola dalla vischnaunca e dalla lescha da scola cantunala.

## **II. Menaschi da scola**

---

### **Art. 3 Reglas da departament**

Il cussegl da scola ed il cerchel scolastic spetgan dils scolars in departament correct.

- Ils scolars han da cumparer ad uras all'instrucziun.
- Ils scolars sedeportan endretg denter els, enviers scolasts, autoritads da scola e persunal da scola.
- Las directivas dils scolasts, dallas autoritads da scola e dil persunal da scola ein d'observar.
- Scadin scolast da classa ei responsabels che ses scolars bandunien la stanza ed ils zulers durent las pausas.
- Senza lubientscha dil scolast eis ei buca lubiu als scolars da bandunar il plaz da pausa enteifer il temps da scola.
- In scolast fa mintgamai durent las pausas survigilanza sil plaz da scola.
- Ils affons han da suandar las directivas dalla persuna survigilonta.
- Durent pausa eis ei scumandau da serender en las stizuns.
- Suenten scola ein tuts scolars obligai da serender immediatamein a casa.

#### **Art. 4 Scamonds generals sil plaz da pausa**

Duront scola eis ei scumandau da

- carrar cun vehichels;
- purtar armas, cuntials ni auters utensils prigulus;
- fimar, consumar bubrondas alcoholicas e tassis enivrants;
- schar sterniu rumians e pupials.

#### **Art. 5 Viadi da scola**

<sup>1</sup> Tuts scolars vegnan a pei a scola cun excepziun da quels che san far diever dil bus da scola ni dil transport organisau.

<sup>2</sup> Nua ch'il bus da scola ni il transport organisau cursescha, ston tuts affons ch'ei pertuccai far diever da quei transport.

<sup>3</sup> La segirada da scola (segirada da mort ed invaliditad) garantescha mo per accidents che succedan duront scola, sil viadi a scola ni duront occurrenzas organisadas dalla scola.

#### **Art. 6 Donns**

Scadin scolar ei obligaus d'haver quitau dil mobiliar e dallas localitads da scola. Donns caschunai sapientivamein ston vegnir indemnisai entras ils geniturs dils scolars pertuccai ni tenor decisiun dil derschader da giuvenils.

#### **Art. 7 Sortida**

Igl ei giavischeivel ch'ils affons ein la sera ad uras a casa. Sco directiva vala:

Ura da stad: 21.00 uras

Ura d'unviern: 20.00 uras

#### **Art. 8 Occurrenzas dalla sera**

Il frequentar occurrenzas dalla sera ei lubiu en accumpignament dils geniturs. Ils affons ston serender a casa culs geniturs.

#### **Art. 9 Participaziun ad uniuns**

<sup>1</sup> La participaziun sco commember d'uniuns da carschi (p.ex. cant, musica eav.) sa succeder el senn da collaboraziun cun consentiment dils geniturs, dil scolast e dil cussegl da scola.

<sup>2</sup> Gruppas d'interess astgan buca vegnir fundadas senza il consentiment dil cussegl da scola.

<sup>3</sup> Da talas gruppas san scolars separticipar activamein, sche quellas ein tgamunadas da persunas competentas. Tuts exerchezis e tuttas scuntradas han da haver liug sil di ed astgan buca collidar cun l'instrucziun da scola.

<sup>4</sup> Ein las prestaziuns da scola buca sufficientas ni il sedepurtar buca tolerabels, sa il cussegl da scola retrer il dretg da participaziun.

### **Art. 10 Surpassaments e castitgs**

Surpassaments da quest uorden disciplinar vegnan castigai dil scolast e tenor basegns annunziai al cussegl da scola resp. derschader da giuvenils.

### **Art. 11 Obligaziun da preleger**

Scadin scolast ei obligaus da declarar all'entschatta digl onn da scola e tenor basegns quest uorden disciplinar a ses scolars.

### **Art. 12 Vigur**

<sup>1</sup> Quest uorden passa en vigur cun l'acceptaziun dalla radunonza communal. El remplazza igl uorden disciplinar pils affons da scola dalla vischnaunca da Medel/Lucmagn dils 7 da november 1990.

<sup>2</sup> Quest uorden ei vegnius approbaus dalla radunonza communal dils 1 da settember 2003.

La presidenta communal:

Il canzlist communal:

Anna Bundi-Pally

Valentin Pally